

壬戌春初

澹
堤
詩
州

張
子
城
署

澹堪詩敘

昔吉林干次棠中丞以清德重望顯於光緒中中丞與劭忞有葭莩之誼歲壬申延劭忞長伯都訥廳書院故吉林讀書之士劭忞皆知之中丞嘗謂劭忞吾鄉士習樸僊君宜以經術澤之劭忞謝不敢當已而中丞再至京師劭忞入翰林爲後輩每造中丞寓邸譚論竟日往往燭見跋而後去劭忞問吉林之士中丞曰竹山大小雅才也由是劭忞始諗君學行蓋劭忞長書院時君弱冠方讀書家塾故與君無一日之雅云又十餘年乃見君於晚晴簃晚晴簃者今大總

統徐公禮聘文學之士爲詩社劭忞亦濫廁其間者也與君談吉林舊事輒時時及中丞中丞氣莊而容肅以禮法自持見者皆次且起敬君氣和而貌溫與人交惟恐失人之意人皆樂就之君學於中丞爲高第弟子竊謂君蓋善學中丞者今年夏君出所爲詩俾劭忞序之君詩出入經史彬彬然質有其文中丞所謂樸僊之習豈足以囿賢者哉獨惜中丞已歸道山不及與劭忞評隲君詩爲一昔之譚也膠西柯劭忞

澹堪詩草序

吉林爲我大清龍興之地東帶大海西枕邊牆長白山屏其南黑龍粟末腦溫諸江繚其北其地壇曷岸衍山川纒屬叢林窩集虧蔽天日其旁魄鬱積之氣發爲奇禽猛獸怪鱗之屬搖喉礪吻攫人爲糧故人生其間多俊悍踔絕好勇樂戰鬪馳騁射獵不畏險巖吾觀中古以還中原王氣消洩殆盡自金源氏崛起女真大清繼之以武力定天下當時佐命元勳中興碩輔亡慮皆出於桓桓糾糾之徒而文人學士少概見歷世七八百載其間間有一二詩人見稱於

世者若金之完顏琮完顏瓌完顏鑄清之納蘭成德
諸人而外亦闐無聞焉豈其地氣使然歟或其人之
所重者在彼不在此歟抑渾沌未鑿而開化者遲歟
國變而後余居京師庚申之冬偶與同人約結消寒
詩會余始識吉林詩人成竹山太守及東海徐公立
晚晴簃詩社余與竹山又同預選輯清詩之役時同
社者十餘人而竹山獨昵就余往來最密每有所作
輒相與討論交疵互聖以爲樂余嘗與竹山論及清
末作者宋詩多而唐詩少又其甚者以隱僻生澀爲
古妖艷餽飭爲新詼詭幻怪恣縱無歸爲奇詩之道

遂爲天下裂竹山之爲詩也本乎立命安身之義發
爲溫柔敦厚之詞舉凡聞聞見見事物之紛集吾前
者柴乎其曾不能已已於是肖物以呈形因心以作
律其天才綺練若流霞之散彩而雲物變態也其言
之抑揚高下鳴節赴拍若調笙簧奏金石也其清冷
馨冽之氣若飲甘泉而嚼春雪也夫竹山生長於洪
荒樸塞之鄉鹿豕之與游木石之與居而能卓然自
拔若此且又深慨乎近世之所謂詩人者獨能一挾
其藩馨歎乎高岑李杜之旁而下與完顏納蘭諸子
並驅中原後先輝映此莊子所謂逃空虛者之足音

見所未嘗見於國中者其爲可喜何如也今春竹山
出其澹堪詩草屬序於余孟子曰待文王而後興者
凡民也若夫豪傑之士雖無文王猶興若竹山之不
爲地囿不爲習移非豪傑之士其孰能語於此哉新
城王樹枏

澹堪詩草卷二

吉林成多祿竹山

抱山展墓

平明登抱山樹靜棲羽寂長跪酌佳城往事思歷歷
我父卒丙戌葬日雨淅瀝前母乃同穴負土堅四
壁其地溼且卑我心常戚戚丁酉驚盜發白日飛霹
靂恨無汾陽兵志此徒悲激罪人幸而得沈痛那可
滌我母復見背牛眠此中覓風雨感崩防遷徙同
辟狄傷哉乙巳春万古漆鐙闌東西南北身展轉捧
毛檄二年出守綏三載書考績推恩及九泉褒贈膺

殊錫君恩日以深親面何由覲況當八表昏滿眼愁
鋒鏑華屋與山邱險過矛頭漸生兒亦何用往訓空
啟迪春秋鍤瞻拜禍變同疏逖默數生平罪擢髮豈
足析卬觀松楸寒雨淚紛紛滴

憶榆廬

松花江之西有邨其塔木厯厯雙白榆扶疏繞老屋
遐思齟齬年我父教我讀每書必親鈔篇篇當削
竹每句必口授記誦耳須熟朝曦連夕鐙慈訓爲家
塾我母尤鍾愛時恐遭笞扑朝送屋角東手爲櫛
與沐暮迎屋角西食以果與肉其時榆正新風動錢

藪藪我亦隨風來滿院爭相逐有時披綠陰嬉戲當
綵服二老開口笑謂我如黃犢忽忽四十年此景宛
在目一身倏東西萬事同轉燭自與此廬別迢迢淚
盈掬我父先見背家室幾顛覆中經庚子亂負母
竄山谷白頭感公霜越歲棄我速十年走龍沙忽變
橘中局世外驚滄桑宵中泣莢蓼游子悲故鄉歸來
話樵牧烏刺好江山考槃水一曲爰居避鼓鐘時向
東門伏魚思故池泳鳥戀舊巢宿況此鮮民身往訓
思顧復先廬一已荒樹老枝葉禿頰印萬古天長歌
以當哭

世英兒自黑龍江來視余疾喜作三首

我昔守綏陽是汝初學日殷勤送龍沙所學亦未畢
昏嫁忽催人汝已有家室學人作武夫奮發離我膝
今年我病久獨念汝遠出風雪脩歸來歸來省我疾
汝母喜汝來竈下具黍雞汝弟喜汝來懷中出棗梨
我念汝衣薄宛轉狐裘携人生好滋味骨肉勿相離
風雲滿瀛海何故紛東西夜深耿不寐鐙火寒淒淒
養穀欲其實養木欲其老何呂汝兄妹運厄死獨早
而汝今朝來顏色亦枯槁得勿問米鹽累人到細小
丈夫貴自立詎呂凡情擾耆欲足戕生憂勞庶自保

勉哉身與名兩字汝宜寶

烏刺古臺歌

臺在今烏刺鎮街北偏俗名白花點將臺亦曰不花

城戢戢臺巍巍風雲蒼莽天四垂霸業王氣盤今古
金耶遼耶主者誰繫昔東京上京路寧江長春幾節
度元明往矣清室興太祖親征烏刺部烏刺部貝勒
家層樓複殿飛丹霞粉侯昆弟誇兀朮雌將風流說
不花我來勝地作重九獨立千載誰爲友荒屯敗壘
人煙稀弔古安能記誰某鴨江西浸天倒吞鳳山北
下雲直走欲將往事問荒臺七百年來一回首君不
見遼妝樓元左掖五國放海青混同渡赭白故宮禾

黍無人迹又不見兩京哀三陵愁烏刺獨鎮東海頭
開剏守成皆已矣此臺乃與輝發葉赫哈達名同留

爲宋錢梅題毛西河大草灘圖

千山萬山白草枯窮邊蒼莽天模粘西河老子逞狡
獍落想自與常人殊箸書垂老心未已長槍大戟金
僕姑平沙萬點馬如豆揮豪意氣先吞胡天山一掃
路南北莊浪瓦刺徒區區楮墨流傳二百載海桑劫
火方須與公從何處得此本威聲直與前賢符龍沙
一角孤城孤呼倫貝爾懸雙湖丈夫毛錐果安用儘
可談笑安邊隅歐風亞雨氣一變伊涼歌曲人驚呼

歸來學作煙波徒乘風偶爾游中都起儀叔孫世所
有籌邊充國今豈無高吟時挾朔方氣晚學豈讓蕭
山儒直將立馬興安意對此荒城大漠圖

錢梅有興
安立馬圖

一時題
者甚多

懷人詩三首

鄭蘇戡先生

話別高樓心已傷

辛亥北歸相晤海藏樓
言國之必亡語極哀惋

況聞白雁

與紅羊春風秋水南洋路老卻詩人鄭海藏

海藏樓
在上海

南洋
路

梁節堪先生

梁格莊前鳳輦昇故宮深鎖冷于久疲驢誰似亭林
老白髮如蜷拜孝陵

屠敬山先生

班馬雄文各一家三年橐筆走龍沙我來不見秦淮
海零落春風菜甲花

清明

寒食人家話禁煙紙錢風起賣錫天抱山別後松楸
長淚灑清明又一年

自題香雪尋詩圖

老蛟聳脊凍雲折月踏玻璃笛吹錢千樹萬樹埋香

雪鄧尉之山深復深美人名酒千黃金冷豔幽香開
我襟朝醉梅煙夕梅雨我有新詩在何許獨立花前
澹無語

和張半園述懷詩二首

遶屋高吟黃絹辭成連海上感琴絲驚看詩伯年華
長尙說王孫碧草滋大鳥盤空前路迴孤花吐艷夕
陽遲同儕瘦卻陶元亮老圃寒香共一時

天表星辰曳履聲朱門畫戟總爭迎游蹤跌宕扶桑
路詩律森嚴細柳營馬帳皋比漢遺老牛腰大卷魯
諸生長髯今古誰雄長夢對坡仙一咲成